

Rosa Hendry-Berther

14.10.1925 – 04.10.2016

(Riug da bara)

Nossa mumma ei naschida a Rueras sco secund davos affon dalla famiglia dil Giachen Fidel Berther e Maria, naschida Loretz. Ella ha aunc giu 3 frars e 4 soras.

L'affonza ei stada quella sco ella fuva lezs onns el ravugl da mintga famiglia tuatschina.

Baul eisi stau da segidar en famiglia tenor las forzas. Il pli bugen seregurdava e raquintava ella co ella hagi fatg la purtgera e vadlera a Rueras. Las scolas ha ella frequentau a Rueras tier quaters scolasts.

Silsuenter eis ella stada entgins onns ord la val sco fumitgasa, aschia ad Andermatt, a Turitg ed ils onns 1945/46 a Cuera el spital dalla Crusch.

Nunspitgadamein miera il bab igl onn 1946 ed ella sto vegrin a casa e segidar cun la mumma el menaschi puril. Aschia fa ella la pura ed ha quitau dalla mumma. La roda da filar ed oravontut il taler damogna ella cun plascher e talent.

Igl onn 1949 marida ella il Giochin Hendry da Gonda ed els secasan sisum Gonda. Da 1950 tochen 1963 neschan ils sis affons, tuts parturi a casa. Igl emprem treis buobs e lu treis buobas.

Cun gl'onn 1962 dat ei la gronda midada. Nos geniturs astgan surprender il pensum da pedel ella nova casa da scola. La mumma segida cul bab e fa la casarina. 20 onns fan els quella lavur.

Cun 1982 retuornan els en casa paterna dil bab. Leu gaudan els communablamein il temps da pensiun. Quei schabegia cun s'occupar cun empau dil tut e cun segidar culs vischins.

Muort gronda fleivlezia da vegliadetgna sto il bab serender igl onn 2004 a Mustér en casa da tgira. Cuort sissu miera el il settember da quei onn.

La mumma ei ussa persula a casa cul fegl Giochin.

Tuttenina vul ella serender en casa d'attempai s.Vigeli. Quei succeda igl onn 2006.

Dapi lu gauda ella sin sia moda igl esser en casa da vegls. Aschiditg sco ella po eis ella el liber e gauda las spassegiadas. Quellas daventan pli e pli cuortas e zacu el decuors dalla primavera d'uonn eisi finiu cul saver guder persula l'aria frestga. Ses mals da vegliadetgna ha ella supportau en tutta tgeuadad. Ina stauncladad surprenderella ed il process da sescurdar e sespiarder tschaffa ella da rudien. Avon sis jamnas serenda ella a Mustér el center da sanedad Puntreis. Leu cuntnuescha quei process ton ch'ella sedurmenta dalla fleivlezia la notg dils 4 d'october - per adina.

La mumma ei stada ina femna ferma, spagnusa e da siu fatg. Cun nus affons strengta, oravontut quei che pertuccava la scola e scolaziun. Cheu deva ei pauc da marcadar. Dad ella havein empriu da leger dapli che quei ch'ins stueva, damai ch'ella sezza legeva fetg bia. La mumma ei stada fetg innovativa quei che pertucca ils mieds tecnics. Ils onns 1950 vevan nus gia in apparat da fotografar. Baul vein nus giu radio e televisiun, gie schizun in grammonfon. Era pigl agid en casa ha ella acquistau spertamein ils agids tecnics. Ella mirava fetg bugen televisiun e veva sias series preferidas. Ina occupaziun preferida e quasi regl fuva il sligar legns da plaids, cruscheras. Onns ora e tochen ch'ella ha pudiu ha ella fatg bia bia caltschiel. Sco veneratura da Nossadunna eis ella stada a Lourdes ed ha detg biars, fetg biars paternos. Ella ha giu plascher e gudiu da vegrin tatta e pli tard basatta.

Nus engraziein ad ella per tut il bien ch'ella ha fatg cun nus e per nus. Cara mumma rruaussa en pasch.